



INATSISARTUT

## Aningaasaqarnermut Naalackersuisoq

Ulloq: 20. nov 2012

J.nr.: 01.31.06/12-00603

### **Tallimangornermi ulloq 9. november 2012-imi Aningaasaqarnermut Ataatsimiititaliap aalajangiinera pillugu Naalackersuisunut ilisimatitsineq (suliaq nr. 01.31.06/12-00603)**

**Konto pingaarnermut 50.01.01-imut Aalisarnermut, Piniarnermut Nunalerinermullu Naalackersuisoqarfimmut 2012-imi missingersuutitigut allannguutaanngitsumik ilassutissatut aningaasaliisoqarnissaanik qinnuteqaat**

Naalackersuisut **inassutigaa**:

- konto pingaarnermi 50.01.01-imi, Aalisarnermut, Piniarnermut Nunalerinermullu Naalackersuisoqarfimmut tunngasumi, aningaasaliissutit kr. 332.000-inik amerlineqassasut
- konto pingaarnermi 50.01.09-imi, Ilaasortaanermut akiliutitut tunngasumi, aningaasaliissutit kr. 82.000-inik ikilineqassasut
- konto pingaarnermi 51.01.06-imi, Piniarnermut Nakkutilliisoqarnermut tunngasumi, aningaasaliissutit kr. 250.000-inik ikilineqassasut.

### **Aningaasaqarnermut Ataatsimiititaliap oqaaseqaatai**

Konto pingaarnermut 50.01.01-imut aningaasaliissutit 332.000 kr.-inik amerlineqarnissaat Naalackersuisut qinnuteqarnerminni kissaatigaat. Tamatuma peqatigisaanik konto pingaarnermi 50.01.09-imi, ilaasortaanermut akiliutitut tunngasumi, aningaasaliissutit 82.000 kr.-inik ikilineqarnissaat aammalu konto pingaarnermi 51.01.06-imi, Piniarnermut Nakkutilliisoqarnermut tunngasumi, aningaasaliissutit 250.000 kr.-inik ikilineqarnissaat kissaatigineqarpoq. Naalackersuisut malillugit atuinerussuteqarnissamik naatsorsuutiginninnermut pissutaasut ilagaat allaffeqarfissuarmut nuunnermi naatsorsuutiginnngisamik aningaasartuutit kiisalu XAL-ESU kontoni "saliineq".

Allaffeqarfittaarsuarmut nuunnermi naatsorsuutiginnngisanik aningaasartuuteqarsimaneq ataatsimiititaliamit isumakulunnartinneqarpoq, tassami nuunnissaq 2012-imi aningaasanut inatsisip akuersissutigineqarnerani Namminersorlutik Oqartussat allaffeqarfiannit ilisimaneqalereermat, taamanilu Naalackersuisoqarfiup nuunnissaanut ingerlatsinermut aningaasartuutissat missingerneqareersimasinnaagaluarput. Kiisalu XAL-ESU kontoni salinnermik suliassap allaaserineqarnerani aningaasartuuteqarnerussuteqarsinnaaneq pillugu naliliisoqartariaqarsimagaluarpoq. Piniarnermik nakkutilliisoqarnermi akissarsianut annikinnerusumik atuinerussuteqarnissaq suna tunngavigalugu naatsorsuutigineqarnerusoq paasissallugu ataatsimiititaliap naggasiullugu soqutigaa.

Tamanna tunngavigalugu apeqqutit makku akineqarnissaat ataatsimiititaliamit kissaatigineqarpoq:

1. Naalackersuisoqarfiup allaffeqarfissuarmut nuunneranut naatsorsuutigingisamik sunik aningaasartuuteqartoqarsimava aammalu 2012-imut aningaasanut inatsisip akuersissutigineqarneranut atatillugu aningaasartuutissat taakku soq naatsorsuutigineqarsinnaasimangillat?
2. Nuunnissamat ataatsimoortumik missingersuuteqartoqarsimava imaluunniit nuunnissamat aningaasatigut atugassiissutitut killiliussanik killilersuutinilluunniit nalunaaruteqartoqarsimava?
3. XAL-ESU kontoni salinissamik suliassap allaaserineqarnera pigineqartoq ataatsimiititaliamit naatsorsuutigineqarpoq. Suliassamat tamarmut missingersuutit qanoq annertutigisimanersut kiisalu aningaasartuutit qanoq ittut atuinerussuteqarnermik kinguneqarsimanersut nassuiaatigineqassasoq ataatsimiititaliamit kissaatigineqarpoq.
4. Konto pingaarnermi 51.01.06-imi, Pinniarnermik Nakkutilliisoqarnermut tunngasumi, akissarsianut aningaasartuutissaq missingersuutigineqartunit soq ikinnerussanersut nassuiaatigeqquneqarpoq.
5. Missingersuusiornermut malittarisassami 2008-meersumi immikkoortoq 4.2.3-mi ima allassimavoq: *"Iliuusissap ingerlanneqarnissaanut aningaasanut inatsimmi imaluunniit inatsimmi tunngavissaqanngippat iliuusissap ingerlanneqarnissaa sioqqullugu aningaasaliinissamat tunngavissaq taamaattumik pissarsiariniarneqassaaq. Taamaattumik ukiumi aningaasaliiffiusup naanerani aningaasaleeqqittoqarnissaanik qinnuteqartoqarniassanngilaq, missingersuutitigut qaangiinissaq pinngitsoorneqarsinnaanngitsoq erseqqippat."* Saliineq aammalu allaffinnut nutserneq tunngavigalugit missingersuutinik qaangiinissaq pinngitsoorneqarsinnaanngitsoq Naalackersuisunit paasineqarmat ilassutitut aningaasaliissuteqarnissamik qinnuteqaat matumani pineqartoq nassiunneqarsimanersooq itisilerneqassasoq ataatsimiititaliamit kissaatigineqarpoq. **IMALUUNNIIT:** Ilassutitut aningaasaliissuteqarnissamik qinnuteqaatit aningaasartuuteqannginnermi nassiunneqartariaqarnerannik tunngavimmut ilassutitut aningaasaliissuteqarnissamik qinnuteqaat una naapertuuttut Naalackersuisunit isigineqarpa?

### **Aningaasaqarnermut Ataatsimiititaliap aalajangiinera**

Apeqqutitut siuliani allassimasunut kalaallisut danskisullu, assiliner aamma uunga nassiunneqartumik [julie@inatsisartut.gl](mailto:julie@inatsisartut.gl), kingusinnerpaamik ulloq 7. december akissummik Naalackersuisut nassiussinissaat **tunngavissaatillugu** Naalackersuisut inassuteqaataat Aningaasaqarnermut Ataatsimiititaliamit akuerineqarput.

Aningaasaqarnermut Ataatsimiititaliaq sinnerlugu

Andreas Uldum

Ataatsimiititaliap siulittaasua

**Assilineri:** Aalisarnermut, Piniarnermut Nunalerinermullu Ataatsimiititaliaq